



PHYTOPHTHORA RAMORUM AR LARWYDD JAPAN YN NE CYMRU

1. Mae'r nodyn hwn yn grynodedb o'r wybodaeth am y sefyllfa sy'n datblygu mewn perthynas â brigiad *Phytophthora ramorum* yn ne Cymru. Ar hyn o bryd, dim ond yng nghoetiroedd Llywodraeth Cynulliad Cymru sy'n cael eu rheoli gan Gomisiwn Coedwigaeth Cymru y darganfuwyd y brigiad.

Cefndir

2. Darganfuwyd yr afiechyd cwarantyn *Phytophthora ramorum* yn y DU am y tro cyntaf yn 2002. Yn yr amgylchedd ehangach, mae wedi bod yn bennaf gysylltiedig â'r rhododendron sy'n helpu i gynhyrchu'r sborau. Pan fo digon ohonynt yn cael eu cynhyrchu, gallant heintio coed a phlanhigion eraill sydd gerllaw. Roedd ymdrechion rheoli wedi canolbwyntio'n bennaf ar gael gwared ar y rhododendron. Mae'r Comisiwn Coedwigaeth, Ymchwil Coedwig a'r Asiantaeth Ymchwil Bwyd a'r Amgylchedd (Fera) wedi bod yn gweithio gyda'i gilydd i arolygu, astudio a rheoli'r afiechyd.
3. Ym mis Awst 2009, cadarnhawyd *Phytophthora ramorum* ar *Rhododendron ponticum* yn isdyfiant larwydden Japan aeddfed, ac hefyd ar ddail llwyn larwydden Japan yng Nghernyw. Mae arolygu a phrofi dilynol ar safleoedd eraill yng ngogledd a gorllewin Dyfnaint a gorllewin Gwlad yr Haf wedi cadarnhau presenoldeb *Phytophthora ramorum* ar larwydd Japan o bob oed, ynghyd ag ar rywogaethau yn eu hisdyfiant. Cadarnhawyd hefyd fod dail larwydd Japan heintus yn cynhyrchu pum gwaith y sborau y byddai rhododendron yn eu cynhyrchu ac mae'n bosibl gwasgaru'r rhain yn sylweddol bell, degau o gilometrau mae'n debyg. Mae'r canlyniadau hyn yn amlygu newid sylweddol yn neinameg yr afiechyd. Yn flaenorol, byddai heintiau'n cael eu cyfyngu i fannau ger rhododendron heintus yn unig.
4. Amlygodd arolygon o'r awyr o goetiroedd yn ne Cymru ym mis Mai 2010 symptomau a oedd yn dangos y gallai *Phytophthora ramorum* fod yn bresennol. Mae arolygu a phrofi dilynol wedi cadarnhau heintiau helaeth ymysg larwydd o bob oed yn rhan isaf Cwm Afan, Cwm Garw a Bro Morgannwg yn ne Cymru. Mae arolygon pellach yn dangos bod y sefyllfa'n newid yn gyflym ac mae'n debygol y bydd yr haint wedi lledu ymhellach.

Beth rydym yn ei wneud

5. Rydym wedi gweithredu mesurau bioddiogelwch ar bob un o'r safleoedd heintus. Gweler y mesur bioddiogelwch ar wefan Iechyd Planhigion y Comisiwn Coedwigaeth [http://www.forestry.gov.uk/pdf/phytophthoraprotocol30apr2010.pdf/\\$FILE/phytophtoraprotocol30apr2010.pdf](http://www.forestry.gov.uk/pdf/phytophthoraprotocol30apr2010.pdf/$FILE/phytophtoraprotocol30apr2010.pdf) .
6. Caiff arwyddion eu gosod ger holl fynedfeydd y coetiroedd heintus yn rhoi gwybod i'r cyhoedd am yr haint a gofyn iddynt helpu rheoli lled yr haint.

-
7. Bydd Comisiwn Coedwigaeth Cymru yn trafod trwyddedau eiddo gyda phroseswyr er mwyn galluogi iddynt dderbyn larwydd heintus.
 8. Byddwn yn dechrau torri coed heintus i lawr yn fuan.
 9. Rydym yn parhau i arolygu standiau larwydd Japan yn ne Cymru.
 10. Rydym wedi gorfffen hyfforddi staff Comisiwn Coedwigaeth Cymru mewn perthynas â *Phytophthora ramorum* a bioddiogelwch a byddwn yn estyn hwn i holl berchnogion a rheolwyr coetiroedd cyn bo hir.
 11. Mae staff Grantiau a Rheoliadau yn dilyn mesurau bioddiogelwch ar eu holl ymweliadau safle.
 12. Caiff diweddariadau pellach eu cyhoeddi'n achlysurol. Caiff cyfarfod i roi rhagor o wybodaeth i berchnogion a rheolwyr y sector preifat ei drefnu cyn bo hir.

Symptomau

13. Mae gwybodaeth am symptomau'r *Phytophthora ramorum* a brofwyd hyd yma ar gael yn rhwydd ar wefan y Comisiwn Coedwigaeth <http://www.forestry.gov.uk/forestry/WCAS-4Z5JLL>. Ar larwydd Japan, gall blagur a dail gael eu heffeithio a byddant yn edrych fel blaenau blagur gwywedig, crin a nodwyddau du. Mae'r blagur heintus yn colli eu nodwyddau cyn amser. Mae'n bosibl y bydd gan goed sydd â brigau meirw nifer o ganrau ar eu brigau a boncyffion uchaf sy'n gallu gollwng resin. Gweler y daflen symptomau.

Beth ddylai perchnogion a rheolwyr coetiroedd ei wneud?

14. Ewch i wefan y Comisiwn Coedwigaeth www.forestry.gov.uk/pramorum i gael mwy o wybodaeth ac ymgyswrtu â'r symptomau a manylion eraill.
15. Parhewch i fod yn wylidwrus ac arolygwch eich coed yn rheolaidd, yn enwedig lle mae gennych goed larwydd a/neu rododendron. Sylwch ein bod yn bennaf bryderus am larwydd mewn coedwigoedd a choetiroedd o ran newid yn neinameg yr afiechyd hwn.
16. Os ydych yn amau bod eich coetir wedi'i heintio neu os gwelwch symptomau amheus, dylech roi gwybod i Swyddfa Grantiau a Rheoliadau Comisiwn Coedwigaeth Cymru, Clawdd Newydd, Rhuthun, Sir Ddinbych, LL15 2NL, ffôn: 0300 068 0300, e-bost: www.ts@forestry.gsi.gov.uk
17. Bydd y manylion y gofynnir i chi amdanynt yn cynnwys:
 - Eich enw a chyfeiriad;
 - Rhif ffôn ac e-bost er mwyn cysylltu â chi;

-
- Lleoliad y coetir dan sylw (cyfeirnod grid neu god post neu dref agosaf);
 - Ardal ac oed y larwydd Japan yn fras;
 - Ardal y rhododendron yn fras (os yw'n bresennol);
 - A oes gan y rhododendron (os yw'n bresennol) symptomau;
 - Dyddiad pan sylwoch ar y symptomau yn fras.

18. Os ydych yn poeni am goeden unigol mewn gardd, tir parc neu amwynder, dylech gysylltu â Gwasanaeth Ymgynghori Diagnosteg Iechyd Coed Ymchwil Coedwig ar 01420 23000 neu ewch i www.forestresearch.gov.uk/ddas.

19. Argymhellwn yn gryf eich bod yn rhoi mesurau bioddiogelwch sylfaenol ar waith, yn enwedig os ydych yn poeni am heintio eich coetiroedd [http://www.forestry.gov.uk/pdf/phytophthoraprotocol30apr2010.pdf/\\$FILE/phytopthoraprotocol30apr2010.pdf](http://www.forestry.gov.uk/pdf/phytophthoraprotocol30apr2010.pdf/$FILE/phytopthoraprotocol30apr2010.pdf).

Mehefin 2010